

Jesus se leringe vervul die Mosaïese Wet

Mattheüs 5:17-18 is die gedeelte in die Bybel wat gewoonlik aangehaal word om Ou Testamentiese wetsonderhouding te regverdig:

*“Moenie dink dat Ek gekom het om die wet of die profete te ontbind nie. Ek het nie gekom om te ontbind nie, maar om te vervul. Want voorwaar Ek sê vir julle, voordat die hemel en aarde verbygaan, sal nie een jota of een titteltjie van die wet ooit verbygaan **totdat alles vervul is nie**” (My beklemtoning).*

Die woorde *“totdat alles vervul is”* verwys onder andere na wat ten tyde van Jesus se woorde in **Matt. 5:17-19**, nog moes gebeur. Wat was die “alles” wat eers moes gebeur voordat die wet kon verbygaan? Onder die “alles” wat moes gebeur was die vervulling van nagenoeg 44 Ou Testamentiese profesieë wat betrekking het op die koms van die Messias. Die belangrikste gedeelte van die “alles” wat moes gebeur, was natuurlik die kruisiging, die dood en die opstanding van die Here Jesus. Jesus se verduideliking aan die Emmausgangers i.v.m. die kruisigingsgebeure bring duidelikheid waarom die hele Ou Testament gaan; dit gaan in skadubeeldvorm oor Jesus Christus:

“En Hy het begin van Moses en al die profete af en vir hulle uitgelê in al die Skrifte die dinge wat op Hom betrekking het” (Luk. 24:27, my beklemtoning).

In kort beteken **Mattheüs 5:7-18** dat alles wat in die Wet en die Profete oor Jesus Christus geskrywe is, sou bly staan totdat dit met die kruisiging, die dood en die opstanding van Jesus Christus vervul sou word. Jesus was die realiteit waarna al die skadubeelde van die Ou Testament gewys het. Jesus het nie gesê dat Hy gekom het sodat die wet onderhou moes word nie, maar dat Hy gekom het om dit te vervul.

Hoe het Jesus die wet vervul ? – Deur Sy lewe, dood en leringe

Zodhiates verduidelik die Griekse woord vir “vervul”, *pleróo*, so:

“...to fill out, complete, make perfect, accomplish an end” –The Complete Word Study Dictionary.

Met Sy sterwe het Hy uitgeroep: *“Dit is volbring” (Joh. 19:30)*. Wat is volbring? – die doel waarvoor Hy aarde toe gekom het is volbring! Hy het versoening kom doen vir die sonde van die mensdom en die grondslag kom lê vir die nuwe bedeling van die Nuwe Testament. Hierdie tyd waarin Jesus gekom het om die nuwe bedeling te kom vestig, word deur Paulus die *“volheid van die tyd”* genoem:

“Maar toe die volheid van die tyd gekom het, het God Sy Seun gestuur, gebore uit ‘n vrou, gebore onder die wet, om die wat onder die wet was, los te koop, sodat ons die aanneming tot kinders kan ontvang” (Gal. 4:4).

Die Ou Testamentiese bedeling word ook die Wet en die Profete genoem en dit sou voortduur "... tot op Johannes..." (**Luk. 16:16**), met ander woorde, tot en met die prediking van Johannes die Doper is Ou Testamentiese beginsels verkondig. Ná die onthoofding van Johannes lees ons nie weer dat God deur 'n Ou Testamentiese profeet praat nie. Hierdie feit word bevestig deur **Hebreërs 1:1-2** wat verklaar dat

"Nadat God baiekeer en op baie maniere in die ou tyd gespreek het tot die vaders deur die profete, het Hy in hierdie laaste dae tot ons gespreek deur die Seun."

(Het die onthoofding van Johannes die Doper miskien simboliese betekenis in die sin dat dit die dood van die Ou Testamentiese era simboliseer?)

Dit wat Jesus voor Sy kruisiging aan Sy dissipels gesê het, dra baie daartoe by om die betekenis van Sy woorde in **Mattheüs 5:17-19** beter te verstaan. Hy het aan hulle gesê dat sekere dinge eers na die uitstorting van die Heilige Gees vir hulle duidelik sou word:

"Nog baie dinge het Ek om aan julle te sê, maar julle kan dit nou nie dra nie. Maar wanneer Hy gekom het, die Gees van die Waarheid, sal Hy julle in die hele waarheid lei..." (Joh. 16:12-14, my beklemtoning).

Die implikasie van wat Jesus gesê het is dat die koms van die Heilige Gees eers moes plaasvind voordat die volle betekenis van Jesus se dood en opstanding duidelik sou word. Deur te kyk na wat Jesus verkondig het, word dit heel duidelik wat Hy bedoel het toe Hy gesê het dat Hy gekom het om die Wet te vervul. In die Bergpredikasje, opgeteken in **Mattheüs 5, 6 en 7**, verwys Jesus keer op keer na wat die wet van Moses beveel en kontrasteer dit dan met wat Hy daarvoor te sê het. Ons sien hoe Hy elke keer die morele vereistes van die Ou Testamentiese wet met die veel hoër standaard van Sy leringe vervang. So is Jesus byvoorbeeld nie tevrede met die standaard van die gebod in **Exodus 20:14** wat verklaar dat jy nie mag egbreek nie en "vervul" dit deur te sê:

"Julle het gehoor dat aan die mense van die ou tyd gesê is: Jy mag nie egbreek nie. Maar Ek sê vir julle dat elkeen wat na 'n vrou kyk om haar te begeer, reeds in sy hart met haar egbreek gepleeg het" (Matt. 5:27-28, my beklemtoning).

Jesus veroordeel nie net die daad nie, maar die gesindheid nog voor die handeling plaasgevind het. In die Ou Testament moes daar eers getuienis teen egbrekers ingebring word voordat hulle gestenig kon word. Iemand kon van egbreek verdink word, maar voordat daar nie bewyse ingebring is nie, kon die persoon nie veroordeel word nie. Hierdie situasie kon lei tot 'n tipe moraliteit wat jy vandag nog onder mense kry; doen wat jy wil, maar moet net nie uitgang word nie!

Vergelyk wat Jesus ook met die sesde gebod doen:

"Julle het gehoor dat aan die mense van die ou tyd gesê is: Jy mag nie doodslaan nie...(Ex. 20:13). Maar Ek sê vir julle dat elkeen wat vir sy broeder sonder rede kwaad is, verantwoording moet doen voor die gereg; en elkeen wat vir sy broeder sê Raka! moet verantwoording doen voor die Groot Raad; en elkeen wat sê Jou dwaas! moet verantwoording doen in die helse vuur" (Matt. 5:21-22, my beklemtoning).

Die Tien Gebooe veroordeel die uiterlike daad, maar Jesus stel 'n veel hoër vereiste. Hy veroordeel die gesindheid, of die daad nou plaasgevind het of nie. Die morele standaard van die wet word nie deur Jesus weerspreek of tot niet gemaak nie, maar elke gebod word met 'n hoër vereiste vervang. **Omdat Jesus nie tevrede is met gehoorsaamheid aan net 'n uiterlik stel wette nie, maar 'n sekere hartsgesindheid vereis, is geestelike wedergeboorte nodig sodat die krag van die inwonende Heilige Gees 'n mens in staat kan stel om uit te leef wat Hy verwag (Gal. 5:16).**

Die Vervulling van die Wet

Die Tien Gebooe

Die Nuwe Testament

- | | |
|---|--|
| 1. Geen ander gode (Eks.20:3). | <i>"Ek is die Weg...(Joh. 14:6)</i>
<i>"..geen ander naam onder die hemel.. waardeur ons gered moet word nie"" (Hand. 4:12)</i> |
| 2. Geen gesnede beeld (Eks.20:4). | Rom. 1:22-25, Die beeld van God mag nie verander word na die gelykenis van iets in die natuur nie. |
| 3. Die Naam van God mag nie ydelik gebruik word nie | Moet van elke ydele woord rekenskap gee (Matt. 12:36). |
| 4. Sabbat – Heilig en rus een dag uit Sewe | Sabbat, tipe of skadubeeld van rus in Christus (Heb. 4:10, Joh. 6:28-29). |
| 5. Eer ouers (Eks. 20:12). | (Ef. 6:1-4) Nie net kinders word aangespreek nie, maar ook ouers. |
| 6. Mag nie doodslaan nie (Eks. 20:13). | Sal verantwoording moet doen vir beledigende en kwaadwillige gesindheid (Matt. 5:22). |
| 7. Mag nie egbreek nie (Eks. 20:14). | Deur net met begeerte te kyk, word reeds oortree (Matt. 5:28). |
| 8. Jy mag nie steel nie (Eks. 20:15). | Moet nie net ophou steel nie, maar moet ook produktief wees om te kan deel (Ef. 4:28). |
| 9. Mag nie valse getuienis gee nie (Eks. 20:16). | Jou ja moet ja wees (Matt. 5:33-37). |

10. Mag nie begeer nie (Eks. 20:17).

Gedrag moet vry van gierigheid wees
(Heb. 13:5, 1 Tim. 6:6-10).

Ons sien dus dat elkeen van die bepalings van die Tien Gebooie deur die leringe van Jesus tot 'n hoër morele en geestelike standaard verhef word.

Nick Maartens

Jeffreysbaai

0827826074

nickmaartens@hotmail.com